

25. marts 2015

Inatsisartut aalajangiiffigisassaattut siunnersuut Naalakkersuisut peqquneqassasut inuusuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatisinnaanissaat eqqarsaatigalugu timersornermut højskolemik pilersitsisinaanermut periarfissanik misissueqqullugit.
(Inatsisartunulaa sortat Siverth K. Heilmann aamma Steen Lyng, Atassut)

Siumumi aalajangiiffigisassatut siunnersuut imatut oqaaseqarfigissavarput:

Inuiaqatigiit timikkut anersaakkullu peqqissut pilersinneqarnissaat tamatta soqutigisaraarput, tamannalu ilaatigut timersornikkut periarfissat annertusarneqarnerisigut aamma suliaasaavoq. Taamatuttaaq Nunatsinni inuusuttut pitsaanerpaanik periarfissaqartitaallutik ilinniartitaanerup tungaatigut ingerlariaqqiffigisinnaasaannik inuiaqatigiinni sinaakkusiinissarput Siumumiit ukiorpassuarni suleqataaffigisimavarput siuttuuffigalugulu.

Suliniutit tamakku kingunerit, ersaripput – Nunatsinni ilinniarfeqarfiit ilinniarneqarsinnaasullu ukiuni Namminersornerulernitsinniit maannamut amerliartupiloorsimapput. Pilersitsiortornerit tamakku inuiaqatigiinni ilinniarsimassutsip qaffariartupiloorneranut pissutaaqataalluinnarput. Tamanna Nunatta Naatsorsueqqissaartarfianiit kisitsisit uppenarsarpaat, assersuutiginnarlugu matumani taarusunnarpoq ilinniarnertuunngorniarluni ilinniarneq, tassani 2003-mi nuna tamakkerlugu ilinniartut 158-it ilinniarnertuunngorniarfimmi ilinniakkaminnik naammassinnipput, 2013-imili marloriaataat sinnerlugit 334-it ilinniarnertuunngorniarlutik. Tamanna ilinniarnerup iluani pitsaasumik aamma ineriartortoqarneranik takussutissiivoq, tulluusimaarutissagut tamakku aamma puigornaveersaartassagivut isumaqarnarpoq.¹

Kisianni miserratigissanngilarput inuusuttut amerlavallaarujussuartut suli ingerlariaqqinnissaminnut taakku killiffiannut naleqquttumik neqeroorfigineqarsinnaanissaminnik pisariaqartitsimmata. Inuit tamarmik atuagarsornikkut annertuumik piginnaaneqarnissaat kisiat naatsorsuutigisinnaanngilarput, inuppassuaqarpoq atuagarsornermit allaanerusunik piginnaasaqartunik, taakkulu sulisinnaassuseqarnerat piginnaasaallu aamma inuiaqatigiittut atorfissaqartillugillu pisariaqartippavut, inuiaqatigiit peqqissut pitsaasumillu ineriartortut pilersikkiartuaarnerini.

Taamaammat Siumumiit isumaqataaffigaarput inuusuttunut atuagaqarsornermik allaanerusunik piginnaasalinnut naleqquttunik tulluusakkanillu amerlanerusunik piginnaanngorsarfigisinnaasaannik Nunatsinni pilersitsinissarput pisariaqartinneqarmat. Assaammi sulisinnaasut tamaviisa pisariaqartippavut Nunatta piorsarnerani.

Tamatumani aamma isumaqarpugut Nunatsinni højskolit pilersinneqareersimasut atorluarneqarnerunissaat siunnerfiusariaqartoq, ilisimaaraarpummi højskolit pioreersut tamarmik

¹ (Tabel 1: <http://www.stat.gl/publ/kl/UD/201401/pdf/2013-mi%20ilinniarnertuunngorniarnerit%20aamma%20inuussutissarsiuutinik%20tungaviusumik%20ilinniarnert.pdf>)
Tabel 2: <http://www.stat.gl/publ/kl/UD/201403/pdf/2013-mi%20innuttaasut%20ilinniarsimassusaat.pdf>

ullumikkornit annertunerusumik atorluarneqarnissartik ujartorlugulu pisariaqartikkaat. Ilisimaaraarpullu taamatut atorluaanerunissaq højskolini siulersuisuusut siunnersuusiorfigalugu pilersaarusiorfigaat. Inuusuttortagut

Inatsisartunut aalajangiiffigisassatut siunnersuutigineqartumut tunngaviusumik Siumumiit isumaqataanerput taamaalilluta oqaatigissavarput, aammali inuusuttut ilinniagaannut ilinniarfik GUX Nuuk aamma Kalaallit Nunaanni Timersortartut Kattuffiat GUX Nuummi qaffasissumik timersornermut sammivimmik pilersitsinissamik, ingerlatsinissamik ineriartortitsinissamillu pisussaaffiliisumik pilersitsinissaq pillugu suleqatigiilernerat ilalernartutut isumaqarfigaarput, paasivarpullu qaffasissumik timersornermut sammivimmi ilinniartut siulliit ilinniagaqarnissamut periarersarlutik ilinniarnissartik augustimi 2015-imi aallartissagaat.

Tamaammat aalajangiiffigisassatut siunnersuutip siunertaata ilaa taamaalilluni naammassineqarsinnaanera suliarineqarluni ingerlareermat, naalakkersuisut aalajangiiffigisassatut siunnersuutip akuerineqannginnissaanik oqariartuutaat paasilluarparput. Erseqqissaatigeqqissalluguli atuagarsornermit allaanerusunik piginnaasalinnut tuulluuttumik aamma timersornermik sammivittalimmik højskolit pioreersut suleqatigineqarsinnaanerat suliniutigissallugu naalakkersuisunut kaammattuutigerusukkatsigu, pisariaqartinneqarmat periarfissaammallu pioreersut atorluarnerisigut pilersitsigasuarsinnaaneq.

Siumumiit isumaqarpugut timersornermut højskolimik nunatsinni pilersitsisoqarnissaa suliniutissaasoq pitsaasoq, pilersitsisoqareeraluarpalluunniilli nunani allani timersornerup tungaatigut ilinniarfiit suleqatigalugillu atorluarneqartuarnissaat periarfissaajuannartariaqartoq.

Taamatut oqaaseqarluta aalajangiiffigisassatut siunnersuut maannakkut akuerineqannginnissaanik naalakkersuisut oqariartuuteqarnerat Siumumiit ilalerparput.

Vivian Motzfeldt - Siumut